

Innuttaasunut, aalisartut, piniartut savaatillillu inuussutissarsiorlutik ingerlatsinerminni silap allanngoriartorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqarnissaat siunertaralugu Naalakkersuisut Aningaasanut Inatsimmi kontumik nutaamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Kontomik pilersitsinerup peqatigisaanik kattuffiit attuumassuteqartut suliamut akuliutsinnerisigut ikiorsisarnermik aaqqissuussinermut periusissanik aalajangersaanissamik Naalakkersuisut suliaqassapput, tamanna kontumi pingaarnermi oqaasertaliinikkut imaluunniit namminerisamik inatsisissatut siunnersuuteqarnikkut pissaaq.

(Inatsisartunut ilaasortamit Agathe Fontain-imit, Inuit Ataqtigiit, saqqummiunneqartoq)

(Inatsisartunut ilaasortamit Pipaluk Lyngemit, Inuit Ataqtigiit, tiguneqartoq)

Akissuteqaat

(Nunalerinermut, Imminnut Pilersornermut, Nukissiutinut Avatangiisinullu Naalakkersuisoq)

Aappassaanerqarnera

Aningaasaqarnermut Akileraartarnermullu Ataatsimiititaliaq Inatsisartut aalajangiiffigisassaattut siunnersuut saqqummiunneqartoq pillugu isumaliutissiissuteqarpoq.

Naalakkersuisut Ataatsimiititaliaq peqqissaartumik sulinerannut isumaliutissiissuteqarnerannullu qutsavigaat.

Allannguutissatut siunnersuutip Naalakkersuisunit saqqummiunneqartup akuerineqarnissaa Ataatsimiititaliami amerlanerussuteqartut inassutigigaat, Naalakkersuisut naammagisimaarlugu paasivaat.

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu Inatsisartut inatsisaat nutarterlugu allannguutissatut siunnersuutip UPA2024-mut taarsiullugu UKA2024-mi Inatsisartunut saqqummiunneqarnissaa naatsorsutigineqartoq, Naalakkersuisut oqaatigissavaat. Allannguutissatut siunnersuutip matuma aappassaanerqarnissaata UPA2023-miit UKA2023-mut kinguartinneqarsimanera, tamatumunnga pissutaavoq.

Naalakkersuisut oqaatigissavaat, Naalakkersuisut allannguutissatut siunnersuutaata kalaallisoortaata aammalu danskisoortaata oqaatsitigut assigiinngissuteqarnera tunngavigalugu allannguutissatut siunnersuutip kalaallisoortaata oqaatsitigut iluarsineqarneranik saqqummiussinissaq qulak-keeqqullugu, Ataatsimiititaliap isumaliutissiissummini Naalakkersuisut kaammattormagit, tassami oqaaseq ”tassangaannartumik” kalaallisoortaani allassimangimmat.

Naalakkersuisut allakkiaq siunersuinerup kingorna Ataatsimiititaliamut nassiunneqartoq tunngavigalugu allannguutissatut siunnersuutip oqaasertaasa ilai erseqqissarpaat.

Taamaattumik Naalakkersuisut allannguutissatut siunnersuut oqaatsitigut iluarsineqartoq akuerisassanngorlugu saqqummiuppaat, taannalu imatut nipeqarpoq:

Innuttaasut, ilanngullugit aalisartut, piniartut nunalerinermillu inuussutissarsiutillit, silap pissusaanut tunngasut ajornartorsiortitsinerannik pissuteqartumik, inuussutissarsiutiminnik ingerlatsinerminni ajunaarnersuarmut assingusumik tassanngaannartumik eqqugaasut, aningaasatigut ikiorserneqartarnissaat siunertaralugu inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugit inatsisip atuuttup allanngortinneqarneranik piviusunngortitsinissamik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Tamatuma peqatigisaanik kattuffiit kalluarneqartut akuutereerneranni ajornartoornermi ikiorsiisarnermut aaqqissuussinermut tassunga suleriaasissanik aalajangersarneqartunik Naalakkersuisut siunnersuuteqaqquneqarput.

Taamatut naatsumik oqaaseqarlutik Naalakkersuisut allannguutissatut siunnersuutip akuerineqarnissaa inassutigaat.